



Pifò moun ki ap peye Sekirite Sosyal ap travay pou yon patwon. Patwon yo retire taks Sekirite Sosyal la nan chèk travay yo, peye menm kantite taks avèk travayè a, voye total taks yo nan Internal Revenue Service, IRS, (Sèvis Enpo sou Revni Ameriken), epi voye rapò sou salè travayè yo nan Sekirite Sosyal. Men travayè endepandan yo dwe rapòte kantite lajan yo ap touche epi yo dwe peye taks yo dirèkteman bay IRS.

Ou se yon travayè endepandan si ou ap fè komès, ou ap fè biznis oswa si ou gen yon pwofesyon epi ou ap travay ladan li, poukont ou oswa avèk youn o plizyè asosye. Ou rapòte lajan ou touche bay Sekirite Sosyal lè ou fè deklarasyon federal sou revni ou. Si lajan ou touche apre dediksyon taks se \$400 oswa plis nan yon ane, ou dwe rapòte lajan ou touche a sou Pwogram SE ou (SE Schedule) anplis lòt fòm taks ou dwe ranpli.

Peman taks Sekirite Sosyal ak Medicare

Pousantaj taks Sekirite Sosyal pou ane 2006 la se 15.3 pousan pou moun ki ap travay pou pwòp tèt yo, epi ki fè \$94,200 pou ane a, oswa mwens. Si kantite lajan ou touche apre taks la plis pase \$94,200, ou ap sèlman kontinye peye pòsyon ki pou Medicare la nan taks Sekirite Sosyal la. Pòsyon Medicare la se 2.9 pousan, ki aplike sou rès salè ou.

Gen de (2) kalite dediksyon nan taks sou revni ou ki diminye kantite taks pou ou peye.

Premyèman, kantite lajan nèt ke ou touche nan travay endepandan ou redwi kantite taks Sekirite Sosyal ou pa la mwaye. Sa sanble avèk fason anplwayè yo trete travayè yo dapre lalwa sou enpo, paske patisipasyon patwon an nan taks Sekirite Sosyal la pa konsidere tankou salè pou travayè a.

Dezyèmman, ou kapab fè dediksyon mwaye taks Sekirite Sosyal ou sou Fòm 1040 IRS la. Men dediksyon sa a dwe fèt sou revni brit ou (revni anvan taks) pou detèmine revni brit ajiste ou. Li pa kapab yon dediksyon detaye, epitou li pa dwe nan lis ki sou Pwogram C ou (Schedule C).

Si ou ap touche salè travay avèk salè kòm yon travayè endepandan tou, se taks sou salè ou ki ap peye anvan. Règ sa a enpòtan sèlman si kantite total lajan ou ap touche a depase \$94,200. Pa egzanp, si ou te touche \$20,000 kòm salè avèk \$30,000 kòm

revni travay endepandan ou pou ane 2005 la, ou ap peye taks Sekirite Sosyal ki apwopriye ni sou salè ou ni sou revni travay endepandan ou. Sepandan, nan lane 2006 la, si salè ou touche se \$70,000 epi ou reyalize \$25,000 kòm revni nan biznis ou apre taks, ou p ap peye de (2) taks Sekirite Sosyal sou revni ki depase \$94,200. Patwon ou ap retire 7.65 pousan nan taks Sekirite Sosyal ak Medicare sou revni \$70,000 a. Ou dwe peye 15.3 pousan taks Sekirite Sosyal ak Medicare sou premye \$24,200 nan revni travay endepandan ou epi 2.9 pousan taks Medicare sou \$800 ki rete nan lajan ou touche yo.

Kredi sou Travay

Fòk ou te travay epi peye taks Sekirite Sosyal pandan yon sèten peryòd tan pou ou ka jwenn benefis Sekirite Sosyal. Kantite tan ou bezwen travay la depann de dat ou te fèt, mentou pa gen okenn moun ki bezwen plis pase 10 lane travay (40 kredi).

Pou 2006 la, si lajan ou touche apre taks se \$3,880 oswa plis, ou reyalize maksimòm anyèl pou kat (4) kredi—yon kredi pou chak \$970 revni pandan ane a. Si lajan ou touche apre taks la mwens pase \$3,880, ou toujou kapab reyalize kredi lè ou itilize metòd ochwa ki dekri pi lwen nan fèy enfòmasyon sa a.

Tout lajan ou touche ki kouvri nan Sekirite Sosyal sèvi pou kalkile kantite benefis Sekirite Sosyal ou. Kidonk, li enpòtan pou ou rapòte tout lajan ou touche jiska kantite maksimòm la, selon egzijans lalwa.

Kalkil Revni Nèt ou (apre dediksyon taks yo)

Pou Sekirite Sosyal, revni nèt ou se revni brit (revni anvan taks) ou reyalize nan komès ou oswa nan biznis ou, mwens dediksyon ak depresyasyon biznis la.

Gen kèk revni ki pa konte pou Sekirite Sosyal epi revni sa yo pa dwe antre nan kalkil revni nèt ou.

- Dividann ou reyalize sou pòsyon ou sou investisman ou oswa enterè ou reyalize sou bon kès ou posede, sòf si ou resevwa yo kòm negosyan aksyon ak tit;
- Enterè ou reyalize nan prete lajan, sòf si biznis ou se prete moun lajan;

- Lajan lwaye ou touche nan byen imobilye, sòf si ou se yon koutye byen imobilye oswa ou ofri sèvis regilyèman pou moun ki nan biznis byen imobilye; oswa
- Revni ou resevwa nan yon asosyasyon limite.

Metòd Ochwa

Si revni nèt ou ap touche pi piti pase \$400, revni ou toujou kapab konte pou Sekirite Sosyal, selon yon metòd rapò ochwa. Ou ka itilize metòd ochwa a si revni brit ou se \$600 oswa plis, oubyen lè pwofi ou pi piti pase \$1,600.

Ou kapab itilize metòd ochwa a sèlman senk (5) fwa nan lavi ou. Revni nèt ou ap touche a dwe \$400 oswa plis pandan omwen de (2) lane nan dènye twa (3) lane ki fèk pase yo, epitou revni nèt ou dwe mwens pase de tyè (2/3) revni brit ou.

Men ki jan metòd la fonksyone:

- Si revni brit ou reyalize nan travay endepandan ou se \$600 rive \$2,400, ou kapab rapòte de tyè (2/3) revni brit ou oswa revni nèt ou ap touche a; oswa
- Si revni brit ou se \$2,400 (oswa plis) epi revni nèt ou ap touche se \$1,600 (oswa mwens), ou kapab rapòte oubyen \$1,600 oubyen revni nèt ou ap touche a.

Nòt espesyal pou kiltivatè yo: Si ou se yon kiltivatè, ou kapab itilize metòd rapò ochwa a chak ane. Li pa nesèsè pou ou te gen yon revni nèt ki te omwen \$400 nan ane anvan an. Nou ankouraje ou rele nou pou ou mande piblikasyon an, *A Guide For Farmers, Growers And Crew Leaders—Gid Sekirite Sosyal Pou Kiltivate, Agrikiltè, Epi Chef Ekip* (Publication No. 05-10025). Piblikasyon sa-a disponib sèlman nan lang Angle.

Fason pou Rapòte Revni ou

Ou dwe ranpli fòm taks federal ki pi ba yo jouk 15 avril apre nenpòt ane ou touche revni nèt \$400 oswa plis:

- Fòm 1040 (*U.S Individual Income Tax Return—Deklarasyon Enpo Endividyèl Etazini*);
- Fòm Schedule C (*Profit or Loss from Business—Pwofi oswa Pèt nan Biznis*) oswa Fòm Schedule F (*Profit or Loss from Farming—Pwofi oswa Pèt nan Agrikilti*) jan sa nesèsè; epi
- Fòm Schedule SE (*Self-Employment Tax—Taks Travay Endepandan*)

Ou kapab jwenn fòm sa yo nan Sèvis Enpo sou Revni Ameriken, ak nan pifò bank ak biwo lapòs yo.

Voye deklarasyon enpo ou avèk lis taks ou ansanm ak lajan taks sou travay endepandan ou nan Sèvis Enpo sou Revni Ameriken pa lapòs.

Menm si ou pa dwe okenn taks sou revni ou, ou dwe ranpli Fòm 1040 ak Schedule SE pou peye taks Sekirite Sosyal sou travay endepandan ou. Ou dwe fè sa menm si ou deja ap resevwa benefis Sekirite Sosyal ou.

Aranjman pou Biznis Familial

Manm fanmi kapab opere yon biznis ansanm. Pa egzanp, yon mari ak yon madanm kapab asosye oswa yo kapab alatèt yon antrepriz. Si ou ap opere yon biznis ansanm kòm asosye, nou chak ta dwe rapòte pati pwofi nou reyalize kòm revni nèt sou ranman travay endepandan nou apa (Schedule SE), menm si nou ranpli yon fòm deklarasyon revni ansanm. Se asosye yo ki dwe deside ki kantite revni nèt yo chak ta dwe rapòte (pa egzanp 50 pousan ak 50 pousan).

Kontakte Sekirite Sosyal

Pou plis enfòmasyon epi pou jwenn kopi piblikasyon nou yo, vizite wèbsayt nou nan www.socialsecurity.gov oswa rele gratis nan nimewo telefòn **1-800-772-1213** (pou moun ki pa tande oswa ki tande di, rele nan nimewo TTY nou a, **1-800-325-0778**). Nou ka reponn kesyon espesifik yo, nan lè 7 dimaten jiska 7 diswa, lendi pou vandredi. Nou bay enfòmasyon tou nan yon sèvis telefòn otomatik ki fonksyone 24 èdtan pa jou.

Si ou bezwen yon entèprèt pou regle afè Sekirite Sosyal ou, nou ka fè ou jwenn youn gratis. Sèvis entèprèt yo disponib ni pou lè ou ap pale avèk nou nan telefòn, ni pou lè ou vini nan biwo Sekirite Sosyal. Rele nan nimewo telefòn gratis nou a **1-800-772-1213**. Si ou pa pale Angle, peze 1 epi rete sou liy lan pou jouk lè yon reprezantan reponn. N ap kontakte yon entèprèt pou ede ou. Si afè ou a pa ka fin regle nèt nan telefòn, n ap pran yon randevou pou ou nan yon biwo lokal Sekirite Sosyal, epi n ap fè aranjman pou yon entèprèt ki pale Kreyòl prezan nan moman vizit ou.

Nou trete tout apèl yo avèk konfidansyalite. Nou vle asire tou ke ou resevwa bon jan enfòmasyon avèk jantiyès. Se pou rezon sa a genyen yon dezèm reprezantan Sekirite Sosyal pou kontwòle kèk apèl telefonik.



Social Security Administration
SSA Publication No. 05-10022-HC
If You Are Self-Employed (Haitian-Creole)
January 2006